

王孟英醫話精華

王孟英（士雄）又號潛齋海鹽人曾祖學權
祖國祥父升三世均善醫孟英少孤貧矢志向
學操術尤精不慕榮利時當洪楊之亂往來蘇
浙間避難所至有名著述甚富半毀于兵今所
存者僅潛齋醫書五種

王孟英醫話目次

溫病	一	腫	八七
熱病	一八	痞積	九二
霍亂	二七	痰	一〇〇
暑症	二九	虛損	一〇三
瀉症	三三	驚	一二二
瘧疾	四一	狂	一二五
痢疾	五八	癱瘓	一三八
發斑	六五	暈眩	一一九
瘡疹	六七	厥	一二一
喘欬	七一	血症	一二四
嘔吐	七七	諸痛	一二七
噫	七八	便秘	一三二
呃	七九	胎產	一三五
服	八一	經帶	一四七

王孟英醫話精華

上海秦伯未編纂

普甯方公溥校訂

□ 溫 病

翁嘉順室產後患風溫。經孟英治愈。病染于姑。孟英診曰。高年陰氣太虧。邪氣偏盛。玉版論要云。病溫虛甚死。言人之真陰甚虛。曷足以禦邪熱而息燎原。可虞在兩候之期乎。至十四天果殞。而嘉順亦染焉。初發熱即舌赤而渴。脈數且澀。孟英曰。非善證也。蓋陰虛有素。值憂勞哀痛之餘。五志內燔。溫邪外迫。不必由衛及氣。自氣而營。急與清營。繼投涼血。病不稍減。且家無主藥之人。旁議譁然。幸其舊工人陳七。頗有胆識。力懇手援。孟英曰。我腸最熱。奈病來頗惡。治雖合法。勢必轉重。若初起不先覷破。早已殆矣。吾若畏難推諉。恐他手雖識其證。亦無如此大劑。車薪杯水。何益于事。吾且肩勞任怨。殫心盡力以圖之。病

果日重。昏聩耳聾。自利紅水。目赤妄言。孟英惟以晉三犀角地黃湯加銀花石膏知斛梔貝花粉蘭草菖蒲元參竹瀝竹茹竹葉鳧茛海螵等出入互用。至十餘劑。舌上忽布穢濁垢苔。口氣噴出。臭難嚮邇。手冷如冰。頭面自汗。咸謂絕望矣。孟英曰。生機也。彼陰虛熱邪深入。予一以清營涼血之法。服已踰旬。始得營陰漸振。推邪外出。乃現此苔。惟本元素弱。不能戰解。故顯肢冷。而汗僅出于頭面。非陽虛欲脫也。復與甘寒頻灌。越三日。汗收熱退。苔化肢溫。自始迄終。犀角共服三兩許。未犯一毫相悖之藥。且賴陳七恪誠。始克起九死于一生。繼以滋陰善後而康。

沈裕昆室偶發脘痛。范某與逍遙法。痛頗止。而發熱咽疼。邀顧聽泉視之。知感溫邪。與清散法。疼已而熱不退。七日後目閉鼻塞。耳聾肢搐。不言語。不飲食。顧疑證險。願質之孟英。而沈之兩郎。乃從王瘦石學。因請決于師。瘦石亦謂孟英識超。我當爲汝致之。時已薄暮。乃飛刺追邀。比孟英往診。見其外候如是。

而左手診畢即縮去。隨以右手出之。遽曰：非神昏也。繼挖牙關。察其苔色白滑。詢知大解未行。曰：病是風溫。然不逆傳。膈中而順傳胃府。證可無恐。聽泉學問勝我。知證有疑竇。而虛心下問。豈非胸襟過人處。但溫邪傳胃。世所罕有。而此證如是。駭人者。因素有痰飲。盤踞胃中。外邪入之。得以憑藉。苔色之不形黃燥者。亦此故耳。不可誤認爲寒。夫溫爲熱邪。脈象旣形絃滑以數。但令痰飲一降。苔必轉黃。此殆雲遮霧隱之時。須具溫太真燃犀之照。庶不爲病所欺。且昔人于溫證。僅言逆傳。不言順傳。後世遂執定傷寒在足經。溫熱在手經。不知經絡貫串。豈容界限。喻氏謂傷寒亦傳手經。但足經先受之耳。吾謂溫熱亦傳足經。但手經先受之耳。一隅三反。旣有其逆。豈無其順。蓋自肺之心包。病機漸進而內陷。故曰逆。自肺之胃府。病機欲出而下行。故曰順。今邪雖順傳。欲出未能。所謂胃病。則九竅不利。與逆傳神昏之犀角地黃湯證。大相逕庭。郭雲臺云：胃實不和。投滾痰而非峻。可謂治斯病之真詮。遂疏小陷胸合蠲飲六神湯。加枳朴。

以蘆薈煮水煎藥。和入竹瀝一杯。送下礞石滾痰丸四錢。沈嫌藥峻。似有難色。孟英曰。既患駭人之病。必服駭人之藥。藥不瞑眩。厥疾勿療。盍再質之瘦石聽泉乎。沈頷之。王顧閱方。僉以爲是。且云如畏劑重。陸續徐投可也。翌日孟英與聽泉會診。脈證不甚減。詢知昨藥分數次而服。孟英曰。是勢分力緩之故也。今可釋疑急進。病必轉機。聽泉深然之。病家亦胆壯矣。如法服下。黎明果解膠韌痰穢數升。各恙卽減。略吐語言。稍啜稀粥。苔轉黃燥。藥改輕清。漸以向安。嗣與育陰柔肝而愈。

金祿卿室。沈裕昆之女也。患溫。顧聽泉連進輕清涼解。而病不減。氣逆無寐。咳吐黏痰。舌絳咽乾。耳聾譫語。旬日外始延孟英診焉。曰。體瘦脈細。數尺中更亂。竟是陰氣先傷。陽氣獨發。所謂傷寒偏死下虛人。譬之火患將臨。既無池井。缸貯又空。縱竭心力。曷能有濟。再四研詰。乃知發熱前一日。陡然帶下如崩。是真液早經漏泄矣。否則藥治未譌。胡反燎原益熾。瘵厥之變。不須旋踵。祿卿

堅懇勉圖。孟英以西洋參生地二冬二至元參犀角黃連雞子黃知母爲方。另用石斛龜板鼈甲各四兩。左牡蠣一斤。煮湯代水煎藥。顧聽泉又加阿膠。且云我儕用此育陰鎮陽。充液息風大劑。焉能津枯風動。瘵厥陡生乎。服兩劑果不能減。後惑旁言而禱籤藥附桂乾姜。罔知顧忌。徑至四肢拘攣而逝。是誤藥速其斃而增其慘也。繼而裕昆患溼溫。亦犯重喝而亡。珠小耀太守令媛。驟患頤腫。連及唇鼻。乃至口不能開。舌不得出。孟英視之曰。溫毒也。用射干山豆根馬勃羚羊薄荷銀花貝母花粉杏仁竹黃爲劑。並以紫雪搽于唇內。錫類散吹入咽喉。外將橄欖核磨塗腫處。果吐靛涎而腫漸消。詰朝卽啜稀粥。數日而愈。

王繖石廣文令弟患春溫。始則譫語發狂。連服清解大劑。遂昏沈不語。肢冷如冰。目閉不開。遺溺不飲。醫皆束手。孟英診其脈絃大而緩滑。黃膩之苔滿布。穢氣直噴。投承氣湯加銀花石斛黃芩竹茹元參石菖蒲。下膠黑矢甚多。而神稍清。略進湯飲。次日去硝黃。加海蘆蟄朮黃連石膏。服二劑而戰解肢和。苔

退進粥。不勞餘力而愈。繼有張鏡江邀治葉某。又錢希敏之妹丈李某。孟英咸一下而瘳。惟吳守旃之室暨鄭又僑皆下至十餘次始痊。今年時疫盛行。醫多失手。孟英隨機應變。治法無窮。救活獨多。不勝縷載。

季秋顧聽泉邀孟英視康康侯副轉之恙。切其脈滑數。而右歇左促。且肝部間有雀啄。氣口又兼解索。望其面宛如薰黃。頭汗自出。呼吸粗促。似不接續。坐臥無須臾之寧。便溺澀滯。渾赤極臭。心下堅硬拒按。形若覆碗。觀其舌色。邊紫苔黃。殊不甚乾燥。問其所苦。曰口渴甜膩。不欲飲食。苟一合眼。卽氣升欲喘。煩燥不能自持。胸中懊懣。莫可言狀。孟英曰。此由濕熱誤補。漫無出路。充斥三焦。氣機爲其阻塞而不流行。蔓延日久。津液爲之凝滯而成痰飲。不啻人禽雜處。苗莠同疇。邪正混爲一家。醫見肢冷自汗。不知病由壅閉而然。欲以培正而邪氣方張。得補反爲樹幟。豈非資寇兵而齎盜糧哉。非其類者鋤而去之。乃爲喫緊之治。聽泉曰。良是也。夏間起病。聞自心悸少寐。楊某以爲虛而補之。時尙

出差辦事。暑濕外侵。受而不覺。迨闌差未竣。其病斯發。而諸醫之藥。總不外乎溫補一途。以致愈補愈劇。今擬溫胆法待君可否。孟英曰。脈證多怪。皆屬于痰。今胸痞如斯。略無痰吐。蓋由痰能阻氣。氣不能運痰耳。宜于溫胆中。加薤白。藿仁。通其胸中之陽。又合小陷胸爲治飲痞之聖法。參以梔鼓泄其久鬱之熱。以除懊懣。佐以蘭草。滌其陳腐之氣。而醒脾胃。聽泉深然之。連投二劑。各恙皆減。脈亦略和。而病者以爲既係實證。何妨一瀉而去之。連服大黃丸二次。承氣湯半帖。孟英急止之。曰。畏虛進補。固非。欲速妄攻。亦謬。蓋濕蒸爲熱。灼液成痰。病非一朝一夕而成。治以上下分消爲是。不比熱邪傳府。可一瀉而愈也。越日下部果漸腫。孟英曰。攻痞太速之戒。古人不我欺也。與聽泉商。以前法加黃芩。合瀉心意。再配雪羹投之。痰果漸吐。痞亦日消。而自腹至足。以及莖囊腫勢日加。孟英謂勢已如此。難以遞消。但從三焦設法。則自上而下。病必無虞。與聽泉商。用河間桂苓甘露飲意。而姚平泉孝廉力主崇土勝溼之法。深以寒涼爲不可。

用。衆議仍投前日之藥。孟英曰。前藥原可服也。嫌力不足耳。次日痰中帶血甚多。孟英曰。溼熱薰蒸不已。自氣及營矣。與聽泉暨王子能參軍。商以知蘗生地。犀角。鼈甲。白芍。苡仁。貝母。石斛。茅根。麥冬。滑石。卮子。藕汁。童溺。投之而止。踰數日。又吐。且肢冷自汗。心餒畏脫。姚平泉謂氣不攝血。當主歸脾湯以統之。舉家皇皇。連請診脈者三次。孟英曰。脈來屢變。陳芝江所以不能指實其病。而楊阮諸人皆疑爲大虛之候也。然望聞問切。不可獨憑于指下。今洩如赭石湯。渾赤有脚。其爲溼熱之病。昭昭若揭。初傷于氣分。則津液受灼。以爲痰。漸及于營分。則陰血不安而妄溢。邪氣內盛。豈非病實。而真實類虛。吾不受病之欺也。堅守前議。靜鎮不搖。服二劑果止。孟英曰。血之復吐也。由于氣分之邪以擾及也。欲清氣道之邪。必先去其邪所依附之痰。蓋津液既爲邪熱灼燦。以成痰。而痰反卽爲邪熱之山險也。不妨峻攻其實。而緩行其勢。初進滾痰丸三錢。得下泄氣一次。副轉云。四十日來未有之通暢也。連投數日。始解膠痰黑矢多遍。而小洩

亦漸清長。苔色亦退。寢食遂安。惟下部之腫猶爾也。馬香崖陸虛舟皆主實脾行水之法。孟英曰。諦參脈證。病不在脾。况善飢便燥。口渴溺多。吾方慮轉消證。亟投甘潤之不遑。惡可滲利傷陰。補土却液耶。且脾虛下陷之腫。與溼盛而腫之腫。其膝之上下。內外形勢。必然相貫。今膝之上下。內外凹凸迥判。毫不毗連。蓋由溼熱所釀之痰飲。既誤補而痞塞中焦。復妄攻以流竄隧絡。所謂不能一蕩而錫。勢必旁趨四射。吾當以法取之。會又咳痰帶血。而精神食飲如常。孟英曰。無恐也。此乃前次嚼三七太多。兜澀留瘀。最不宜用。吐而去之。爲妙。但須金水同治。冀咳止而血絡不震動爲要耳。與甘露飲加藕汁童溺服之。四劑而止。咳嗽亦寧。于是專治其下部之腫以固本。加知柏貝母花粉旋覆橘絡絲瓜絡。羚羊角棟實葱鬚豆卷薏苡竹瀝。出入爲劑。二三帖間。其高突隆腫之處。卽覺甚痒。搔之水出如汗。而作葱氣。六七日後。兩腿反覺乾瘦燥痛。莖囊亦隨之而消矣。孟英曰。用此潤藥消腫。尙且乾痛咽燥。設從他議而投燥脾利水之法。更

當何如哉。蓋寒溼則傷陽。熱溼則傷陰。血液皆陰也。善後之法。還宜滋養血液。稍佐竹瀝以搜絡中未淨之痰。使愈後不爲他日之患。更屬法中之法。服之飲食中節。便溺有權。幸無消渴之虞。而竟愈焉。

程燮庭乃耶芷香。今春病溫而精關不固。旬日後陡然莖縮寒顫。自問不支。人皆謂爲虛癰。欲投參附。孟英曰。非癰也。平日體豐多溼。厚味釀痰。是以苔膩不渴。善噫易吐。而吸受風溫。卽以痰溼爲山險。乘其陰虧陽擾。流入厥陰。其易豈容再投溫補。以劫液錮邪。而速其痿厥耶。伊家以六代單傳。父母深憂之。堅求良治。孟英曰。予雖洞識其證。而病情膠轕。縱有妙劑。難許速功。治法稍乖。亦防延損。雖主人篤信。我有堅持。恐病不卽瘳。必招物議。中途歧惑。其過誰歸。倘信吾言。當邀顧聽泉會診。既可匡予之不逮。卽以杜人之妄議。程深然之。于是王顧熟籌妥治。午後進肅清肺胃方以解客邪。燭痰溼而斡樞機。早晨投涼腎舒肝法。以靖浮越。搜隧絡而守關鍵。病果遞減。奈善生嗔怒。易招外感。不甘

淡泊。反復多次。每復必莖縮寒顫。甚至齒縫見紫血瓣。指甲有微紅色。溺短而渾黑極臭。孟英曰。幸上焦已清。中樞已運。亟宜填腎陰。清肝熱。以西洋參二冬二地。菰蓉花粉。知柏連棟。斛芍石英。牡蠣龜板。鼈甲阿膠。雞子黃之類。相迭爲方。大劑連服二十餘帖。各恙漸退。繼以此藥熬膏晨服。午用繆氏資生丸。方各品不炒。皆生晒研末。竹瀝爲丸。枇杷葉湯送下。服至入秋。始得康健。孟英曰。古人丸藥皆用蜜。最屬無謂。宜各因其證而變運之。此其一法也。

仲秋久雨。吳汾伯于鄉試後患恙。自言坐于水號。浸及于膝。人皆以爲寒溼之病。孟英切脈甚數。洩赤苔黃。口乾燥。噎。因謂其尊人醞香曰。病由暑溼而體極陰虧。已從熱化。不可以便泄而稍犯溫燥之藥。先與輕清肅解。繼用甘涼撤熱。漸能安穀。半月後。熱始退盡。而寢汗不眠。投以大劑滋填潛攝之藥。兼吞五味子磁硃丸數十帖。乃得康復。此證誤治卽敗。少謬亦必成損。苟非誠信于平日。焉能誠服于斯時。聞其寢汗不收。夜不成寐之間。旁言嘖嘖。孟英恐其搖

動主意必致全功盡棄。囑其邀顧聽泉許芷卿質政。而顧許咸是孟英議。于是主人之意甚堅。而大病乃痊。吁談何易耶。翁嘉順之婦弟吳某。勞傷之後發熱身黃。自以爲脫力也。孟英察脈。與數。是溼溫重證。故初起卽黃。亟與清解。大便秘澀。小溲甚赤。溼熱已得下行。其熱卽減。因家住茅家埠。吝惜輿金。遽爾輟藥。七八日後復熱。譫語昏聩。抽痙遺溺。再懇孟英視之。溼熱之邪擾營矣。投元參犀角。菖蒲連翹。竹茹。竹葉銀花。石膏。泄衛清營之法。佐牛黃丸。紫雪丹。而瘳。腎皮已塌。亟令貼羊皮金。不致成瘡而愈。

沈南台年三十七歲。初冬在鄉收租。將歸飽啖羊肉麵條。途次卽發熱。頭疼到家。招沈某視之。謂其體豐陽氣不足。以致傷寒夾食。表散消導之中。佐以薑附。數帖後熱壯神昏。諸醫束手。交八日。所親許錫卿吳久山交薦孟英圖之。苔色黃膩。口不甚渴。粒米不沾。時時火升。汗躁譫語。溲赤便秘。面晦睛紅。呼吸不調。胸前拒按。脈則虛爽微帶絃滑。不甚鼓指。曰體氣素虧。然脈證太覺懸殊。

必因痰阻清陽。故氣壅塞而脈更無力也。劑以小陷胸合雪羹。加旋菖薤枳。戇子胆星。服後痰卽吐。脈較起。再服譚語息。三服痰中帶出紫血數塊。四服熱退。而汗躁胥蠲。七服苔淨胸舒。洩長口渴。改予甘涼濡潤之法。服數帖痰已漸少。舌布新苔而仍不更衣。覺有穢氣上衝。亦不知飢。仍予甘涼養胃。佐以蘭葉野薷。微露降其濁氣。數帖後穢氣除。粥食進。但不大解。家人憂之。孟英曰。既無所苦。能食脈和。靜俟水到渠成。不可妄行催動也。既而加穀起牀。便猶不解。病者停藥旬日。計起病已交一月矣。粥嫌不飽。意欲食飯。復請孟英商之。孟英曰。可食也。藥則不當停。亟宜培養涵濡。俾其轉運也。授參朮歸苓杞麻半芍少佐枳殼爲方。服十二劑。始得暢解。堅矢嗣與峻補善後。尋卽復元。續有宣氏婦脈體極虛。患溫而胸次痞悶。苔黃垢膩。醫皆畏難而退。孟英以輕清肅化之藥數劑。苔退胸舒。卽能進粥。隨予生津養血。又旬日更衣而愈。觀此則黃苔宜下之說。須合脈體以爲可否也。

癸卯春卽秋子令堂年近六旬。患寒熱如癰者久矣。諸醫雜治罔效。孟英視之曰。此濕邪久蘊。已從熱化。誤投提補。動其肝陽。痰飲因而上逆。與通降之法。寒熱卽減。而包某謂瘧久陰虛。理宜滋養。病家聞之。近是。遂進首烏鼈甲等藥。漸至脈伏胸痞。呃成自汗。渴飲不食。額赤便泄。包某束手。疏生脈散以塞責。舉家徬徨。再求孟英診之。曰。此滋膩阻塞氣機。清陽不司旋運。痰飲閉滯。隧絡非脫象也。補藥不可進。以栝婁薤白合小陷胸。加菖蒲竹茹旋覆貝母杏仁紫菀枇杷葉投之。呃止脈出。大有轉機。而鄭某謂病固屬痰。須溫熱以宣通。勿寒涼而凝遏。病家又惑焉。姜桂頻投。既而脣腫咽疼。不能進飲。舌乾短硬。難出語言。復請孟英救療。與犀角地黃湯加元參知母銀花竹黃花粉胆星石菖蒲竹瀝之類。六七劑。吐出極臭膠痰甚多。粥飲漸進。此第三次生機也。奈狂瀾莫障。邪說橫行。輒以涼藥不宜擅服。久病必定元虛。甘言悅耳。遂至升散溫補。各逞所能。符咒此方。罔不徧試。延至仲夏。膠腐齟糜。脣高數寸。竟成燎原莫救。仍懇

孟英設法。乃堅辭不能措手。付局醫黃某敷治。腫爛日甚而終。

戴氏婦年五十六歲。仲冬患感。初服楊某歸柴丹參藥一劑。繼服朱某乾姜蒼朮厚朴藥五劑。遂崩血一陣。謂其熱入血室。不可治矣。始延孟英診之。脈形空爽。促數。苔黑舌絳。足冷而強。息微善笑。詢其訊斷。踰十載。曰冬溫失于清解。營血暴脫于下。豈可與熱入血室同年而語耶。必由誤服熱藥所致。因檢所服各方而歎曰。小柴胡湯與冬溫何涉。卽以傷寒論。亦不能初感卽投。况以丹參代人參。尤爲悖謬。夫人參補氣。丹參行血。主治天淵。不論風寒暑溼各氣初感。皆禁用血藥。爲其早用。反致引邪深入也。既引而入。再誤于辛熱燥烈之數投。焉得不將其僅存無幾之血。逼迫而使之盡脫于下乎。女人以血爲主。天癸既絕。無病者尙不宜有所漏泄。况溫邪方熾。而陰從下脫。可不畏哉。病家再四求治。孟英與西洋參。菴蓉。生地。犀角。石斛。生芍。銀花。知母。麥冬。甘草。蔗漿。童便。兩劑足溫。舌潤。得解。醬黃。脈數漸減。而熱益甚。乃去犀角。加高麗參數帖。脈漸